

ANDAMON ANG DALAN (Mark 1:1-8)

Dr. Wes Bredenhof, pastor of Providence Canadian Reformed Church Hamilton, Ontario
Preached At: Langley Canadian Reformed Church Langley, B.C.

Translated by Jeffrey Pedraroja Uriarte

Title: Andamon ang Dalan ([Making the Way Ready](#))

Text: [Mark 1:1-8](#)

Preached: 2006

Hinigugma nga kongregasyon ni Kristo,

Daghan kanato ganahan matulog sa adlawng Sabado. Labi na gayod sa mga batan-on. Kung batan-on ka pa, murag lami kaayo nga matulog nga walay mata-mata. Hangtod nga naa mosablig ug bugnaw nga tubig sa imong nawong. Lawom kaayo ang imong tulog ug kalit lang nga ang imong inahan o amahan, igsoon ba kaha, mosulod sa imong kwarto ug sabligan ka ug pinakabugnaw nga tubig.

Unsay nahitabo sa atong teksto sama usab nianang nga hitaboa. Si Juan ug ang iyang ministeryo usa ka bugnawng tubig nga gisablig sa Dios sa nawong sa Iyang katawhan aron pukawon sila. Nihit ang propesiya – mura gani nga, sa tibuok panahon, nahilom ang propesiya. Taliwala sa mga tawo adunay pipila, sama ni Simeon ug Anna (babaye nga propeta), nga nagahulat gayod sa Mesiyas. Apan daghan sa uban ang nanghikatulog. Diyutay lamang ang pagpakabana o pagpangandoy sa katumanan sa mga saad sa Dios. Ngani hinuon, ang ilang gitagaag bili mao kung unsa lamang ang ilang kasamtangang kahimtang – ang ilang nasod ug katawhan nailalom sa pagdumala sa Roma ug sa iyang mga alipores. Ang nagdilaab nga isyu mao kung unsaon nila paghigawas sa Romanhon panggamhanan. Mao kini ang kahimtang samtang si Juan nagwali ug nagbautismo.

Sa paagi nga gilarawan ni Marcos ang ministeryo ni Juan, si Juan niabot nga nagsangyaw sa pag-abot sa kaluwasan. Ang unang mga bersikulo sa atong teksto nahimong titulo niini nga libro. Gisultihan kita nga mao kini ang sinugdanan sa maayong balita ni Kristo, ang Anak sa Dios. Gipili ni Marcos nga ingon niani ang pagsugod sa maong sugilanon sa maayong balita sa kaluwasan pinaagi sa paghatag pagtagad sa ministeryo ni Juan, usa ka ministeryo nga daan nang gitagna sa Daang Tugon. Sa mga pulong sa Malachi 3:1 ug Isaiah 40:3, atong makita nga adunay paghulat sa usa ka mag-unang mensahero sumala sa propesiya. Mao kini si Juan nga maoy mag-andam sa dalan sa Mesiyas. Siya mao ang magsablig sa bugnaw nga tubig ngadto sa nawong sa Israel aron andamon sila sa pag-abot ni Kristo.

Importanteng mahibaloan nga gibuhat kini ni Juan sa deserto ug sa Suba sa Jordan. Adunay mensahe niini. Ang Israel kinhanglan moagi latas sa deserto ug Suba sa Jordan aron makaabot sa Yutang Saad. Ang deserto ug Suba sa Jordan maoy mga pag-andam o mga lakang ngadto sa pinakadako nga nahitabo nga kaluwasan sa Daang Tugon. Mao nga angayan lamang nga si Juan didto sa deserto, didto taliwala sa Suba sa Jordan, magsablig ug bugnaw nga tubig sa nawong sa

Israel aron pukawon sila. Ug sultihan sila pag-usab nga ang kaluwasan ania ug mangandam sila. Mao nga karon madunggan nato ang pulong sa Dios nga igawali sa temang,

GIANDAM NI JUAN ANG DALAN ALANG KANG GINOONG JESUS

Sa iyang ministeryo madungong nato ang tawag alang sa:

1. Paghinulsol
2. Pagwali
3. Pagpakabana

1. Sa iyang ministeryo madungong nato ang tawag alang sa paghinulsol.

Ang bersikulo 4 nagusulti kanato nga si Juan nagwali mahitungod sa bautismo sa paghinulsol alang sa kapasayloan sa mga sala. Daghan siyag gitudlo gikan niining pipila lamang ka mga pulong. Kinahanglan nato kini homayhimayon aron masabtan gayod nato kung unsa ang giwali ni Juan.

Una sa tanan, kinahanglan nato sabton kung unsa ang bautismo sa daang kasabutan. Usahay maghunahuna kita nga ang bautismo usa ka butang nga gihimo lamang sa panahon sa Bag-ong Tugon. Apan ang mautod nga ang bautismo nahitabo na sa Daang Tugon. Ang bautismo sa Daang Tugon alang sa mga Gentil. Kung ang usa ka dili Judio mahimong kabahin sa katawhan sa Dios, adunay tulo ka mga butang nga iyang buhaton: Pagtuli alang sa mga lalaki, bautismo, ug mga halad sakripisyo. Ang mga natawo ng Judio dili na kinahanglan ug bautismo. Ang bautismo mura ra ug ritwal nga paghinlo alang sa mga Gentil. Wala gayod kini klaro nga gisugo sa Daan Tugon, apan usa lamang sa mga gimbuhaton gawas sa Bibliya nga gitudlo sa mga Judio gatasan ka mga tuig sa wala pa matawo si Kristo.

Mao kini nga ang matuod si Juan wala nagtudlo ug bag-ong butang. Ang mga Judio moila nga ang bautismo bahin sa ilang relihiyosong kinabuhi. Ang bag-o hinuon alang kanila mao nga kinahanglan sila diay mismo ang bautismohan. Si Juan naga-ingon nga ang katawhan sa Dios nahimong mahugaw. Hugaw sila ug kinahanglan ug paghugas. Nahisama ra sila sa mga Gentil. Ang sa ingon ana nga kahimtang, dili gayod sila makabantay o makadungog sa tingog sa Usa nga Dinihugan sa Dios, ang Mesisyas, ang Kristo. Tungod niini, alang sa usa Judio nga buot magpabunyang kang Juan, usa kini ka dako nga lakang. Ang pagpabunyang kang Juan sama ra nga nag-ingon siya nga “Kinahanglan ako malimpyuhan. Mahuagaw ako ug makasasala. Sama lamang ako sa mga Gentil.” Nagapasabot lamang kini nga siya nagpaubos gayod sa Dios.

Si Juan nagwali nga ang mga Judio kinahanglan modawat niining pagbunyang. Gilarawan kini ni Marcos nga bunyang sa paghinulsol alang sa kapasayloan sa mga sala. Ang pagbunyang sa paghinulsol. Unay pasabot niana? Kini bunyang nga may kalabotan sa paghinulsol. Kung ang mga Judio mahinulsulon, nan kining bunyang alang kanila. Aron maklaro, atong tan-awon sa makadiyot kung unsay kahulogan sa paghinulsol. Sa Daang Tugon, ang pulong paghinulsol mao

ang metanoeo [ginalitok ‘metah-no-eh-o’]. Ang literal nga pasabot mao ang pagbag-o sa hunahuna. Mao ang pagbaton ug bag-ong panghuna-huna. Sa niini nga particular nga higayon, ang mga Judio kinahanglan nga bag-ohon nila ang ilang panghunahuna mahitungod sa daghang mga butang. Nasayop sila sa sa ilang gilauman ug gitinguha. Naglaom sila nga adunay pulitikal nga kagawasan gikan sa mga Romanhon imbes unta nga maglaom sila sa Mesiyas. Nasayop sila mahitungod sa ilang kaugalingon. Mahinanbugon sila nga nagmugna ug sugo ug balaod nga naglubog na hinuon sa tinuod nga kahulogan and sentro sa Kasulatan – mao ang pag-abot a Mesiyas. Nasayop sila mahitungod sa Dios. Nagtuo sila nga ang Dios mahimuot sa mga buhat sa balaod nga gawas lamang, nga dili kinasingkasing. Nagtuo sila nga pwede nila maangkon ang pabor sa Dios pinaagi sa mga maayong buhat. Dinhi ug sa uban pang mga butang, ang ilang hunahuna ug binuhatan sukwhi sa unsay sakto. Ug ang gamut niining tanan mao ang garbo. Alang kanila, ang kahulugan sa paghinulsol mao ang pagpaubos sa ilang kaugalingon and pagdawat sa bunyag ni Juan isip maoy pagpakita sa ilang pagpaubos.

Karon angayan lamang nga hatagan pagtagad nga kining paghinulsol giingon nga mao ang “kapasayloan sa mga sala.” Pwede kining sabton nga nag-ingon nga ang mga tawo mapasaylo lamang sa ilang mga sala kung sila maghinulsol ug modawat sa pagbunyang ni Juan. Ato kining makita nga sulat sa Bag-ong Tugon, apan daling malimtan nga nia pa diay kini sa panahon sa Daang Tugon. Sa panahon sa Daang Tugon, ang kapasayloan sa mga sala adunay kalabutan sa sistema sa sakripisyo. Tungod kay aduna kini koneksyon sa pag-abot ni Kristo, ang sistema sa sakripisyo mao ang paagi nga ang mga sala mapasaylo sa Daang Tugon. Nagpasabot ba kini nga ang pagbunyang ni Juan usa na ka bag-ong pamaagi? Maghunahuna ba kita nga adunay duha na ka pamaagi aron mapasaylo ang mga sala? Nga pwede kang mamimil kung pinaagi ba sa mga sakripisyo o sa paghinulsol ug pagpabunyang kang Juan? Dili. Dumdoma nga ang sulat ni Marcos mubo lamang. Wala niya gisulti kanato ang tanan nga gisulti ug gibuhay ni Juan o sa mga nakadungog kaniya nga nagwali. Kung tinu-od gayod sila nga naghinulsol, ila gayod untang talikdan ang pagsimba nga basi sa ilang kaugalingong kabubut-on. Ang tinuod nga naghinulsol maghalad gayod ug mga sakripisyo ug sa maong paagi makadawat ug kapasayloan sa mga sala. Tan-awa, si Juan wala naghatag ug bag-ong pamaagi sa kaluwasan ug kapasayloan. Iya na hinuon gitultolan ang mga tawo balik sa Dios ug sa iyang mga pamaagi. Gitultulan na hinuon niya ang mga tawo balik sa Kasulatan nga ang nagtudlo kang Kristo.

Sa maong paagi, giandam ni Juan ang mga tawo alang sa ministeryo ni Kristo. Tungod kay ilang gipaubos ang ilang mga kaugalingon ug nakasinati ug repormasyon, ang mga Judio mahimong makapaminaw na sa pagwali sa Mesiyas. Ug mao gayod kini ang atong makita nga nahitabo, bisan kon sa ginagmay lamang diha sa ebanghelyo matod kang Marcos.

Ug unsa man kini alang kanato? Atong pamalandungan sa makadiyot. Aduna bay mga paagi nga kita, sama sa mga Judio sa panahon ni Juan, nga nagpakyas pagsabot niining tanan? Aduna bay mga paagi nga kita, mga katawhan sa Dios karon, kinahanglan sabligan ug mabugnaw nga tubig sa atong mga nawong aron makamata? Sa atong iglesia ug sa atong kaugalingong kinabuhi, asa ba kita nanghikatulog ug nahikalimot sa mga importanteng butang? Mga igsoon, usa sa mga makuyaw nga mahitabo karon mao nga mahimo kitang komportable sa simbahan ug sa katilingban. Mahimo nga dili na kita makigbugno kay nahimong masayon ang atong kinabuhi ug walay pagdili kanato nga magkinabuhi sa atong relihiyon. Nagaingon sila nga ang Satanas

ganahan ug panagbingkil, apan usahay ang pagkamalinawon mahimo usab nga dulaanan ni Satanas. Ang kalinaw nga atong natagamtaman karon sa atong iglesia ug sa katilingban mahimong panahon sa espirital nga pagtubo. Apan usab mahimo nga ang daghan kanato manghikatulog. Usahay gibalewala nato kining mga butanga. Nahimo kitang mga taphaw nga Kristohanon, o kaha mga Kristohanon nga nahiuyon na sa kultura. Ang iglesia nahimo natong palibot sa pamilya ug mga higala, apan mao ra kana. Sa asa kaha nga kita karon, isip iglesia ug tagsa-tagsa ka magtutuo kinahanglan maghinulsol ug mahigmata aron mahimong katawhan sa Dios sumala sa iyang pagtawag kanato? Kini angayan natong hunahunaon.

Mopadayon kita gikan ngari ug atong tan-awon ang elemento sa propesiya sa ministeryo ni Juan

2. Sa ministeryo ni Juan atong nadungog ang tawag sa pagwali.

Atong nakita nga kini nga teksto nahitabo sa Daang Tugon nga panahon. Ngani, atong masulti nga si Juan maoy katapusan nga propeta sa Daang Tugon. Si Marcos ug ang ubang nagsulat sa ebanghelyo nagpahayag nga si Juan nagsul-ob ug sanina nga binuhat sa buhok sa kamelyo ug aduna siyay bakus nga panit sa mananap. Ang 2 Hari 1:8 naghatag usab ug samang paglarawan kang propeta Elijah. Ug sa ebanghelyo ni Juan, sa pagkadungog nila nga siya dili mao ang Mesiyas, ang una nilang gihunahuna nga siya mao si Elias. Si Juan klaro kaayo nga adunay gayoy pagkapropeta sa iyang panagway. Si Juan usa ka propeta.

Sa Daang Tugon, ang mga propeta gipadala sa Dios aron ipadayag ang iyang kabubut-on ug pagtudlo sa mga tawo. Usahay malimot kita nga ang propesiya dili sama sa mga pagpanagna sa kapalaran. Usahay ang propesiya sama niana, apan kasagaran ang propesiya sa Daang Tugon nahitungod sa pagbag-o ug pag-aghat. Ang Dios makigsulti pinaagi sa propeta aron sa pagtudlo sa iyang katawhan ug bililhon nga mga butang. Usahay ang mensahe adunay kalabutan sa paghukom. Kung ang mga tawo daw haruhay na, ang Dios mosulay ug mouyog kanila pinaagi sa mensahe sa propesiya. Usahay ang mensahe mahitungod sa kahupayan ug kaluwasan. Kung ang katawhan nag-antos, ang Dios moabot uban ang mga pulong sa pagdasig ug paglaum.

Kaning duha ka bahin Makita nato sa kinatibuk-an sa ministeryo ni Juan sa mga ebanghelyo. Si Juan niabot aron magwali ug paghukom ug kaluwasan. Apan sa ebanghelyo ni Juan, and Balaang Espiritu naghatag gayod ug pagtagad sa bahin sa kaluwasan sa ministeryo sa pagpropesiya ni Juan. Gisuginlan kita nga an gang iyang ministeryo adunay kalabutan sa pagpasaylo sa mga sala. Gisuginlan kita nga daghang mga tawo gikan sa Judea ug erusalem ang nagpunsisok ngadto kang Juan. Gisultihan kita nga ilang gisugid ang ilang mga sala ug nagpabunyang. Sa sulat ni Marcos, ang Balaang Espiritu wala nagsulti kanato mahitungod sa panaglantuhi batok ni Juan ug mga Pariseo – sama sa gisulat sa ebanghelyo ni Juan (lain nga Juan). Wala nato mabasa diri ang mahitungod sa paglain sa mga tahop ug sa kalayo nga dili mapalong, ang mga anak sa bitin, o ang hatsa nga giton na sa gamut sa kahoy – nga atong nabasa sa Mateo. Wala, kay si Marcos mas naghatag ug pagtagad sa pagpropesiya sa pagmantala sa kaluwasan sa katawhan.

Ang mensahe ni Juan, sumala sa gisugilon ni Marcos, mahitungod sa Mesiyas nga naa na sa pultahan. Wala pa Siya mosulod, apan hapit na gayod. Mao kini ang gisaad nga Mesiyas nga maoy magdugmok sa ulo sa bitin. Mao kini ang magtuman sa tanang mga saad sa Dios sa

kasabutan. Mao kini ang gilandong sa mga sakripisyo ug seremonyas sa mga balaod ni Moises. Hapit na gayod Siay moabot. Samtang nagatindog sa deserto, sa Suba sa Jordan, si Juan nagsangyaw nga ang Kristo mianhi aron pagdala sa katawhan ngadto sa Yutang Saad sa kapahulayan sa Dios. Ang tibuok nga katuyoan sa ministryo ni Juan mao ang pag-andam sa mga tawo alang nianang dakong adlaw nga si Kristo mopakita na sa tanan.

Si Juan gilarawan sa pulong nga Griyego (1;7) nga nagpasabot “magwawali (herald).” Ang magwawali adunay espesyal nga trabaho sa karaang kapanahonan. Ang magwawali tigdala sa mensahe gikan sa Hari. Siya ipadala aron sa pagsibya sa mga maayong balita alang sa Hari. Ang iyang mensahe mao ang mensahe sa maayong balita sa Hari.

Ug ang maayong balita mao nga ang Hari moabot na. Ang Mesiyas sa Dios nga may gahom nga labaw sa tanan nga nag-una ng miabot. Ang Dinihogan sa Dios nga bisan si Juan dili gani ikatandi, and Dinihogan sa Dios nga bisan si Juan dili takos nga magtangtang sa mga hikot Iyang sandalyas. Kini nga propesiya maayong balita alang sa katawhan sa Dios ug kini gimantala uban ang paglaum nga ilang giandam ang ilang mga kaugalingon alang sa iyang pag-abot. Kung ikaw mahibalo nga oabot na ang Hari, ntural gayod nga mangandam ka.

Sa pagpakita na ni Kristo sa dayag, si Juan usab naghinayhinay na pagpakaubos. Ang trabaho ni propeta Juan natapos na. Si Kristo nga Hari mao nay mohimo sa trabaho. Si Kristo nga Hari gidihogan usab nga Kristo nga Propeta. Apan, sa paglabay sa panahon, si Kristo nagtudlo usab ug mga propeta ilalom kaniya. Pagkahuman niya mikayab sa langit, si Kristo nagpadayon sa iyang pagkapropeta pinaagi sa iyang mga apostoles ug sa uban pa. Kita karon nasikapon nianang “uban pa.” Kita nakaambit sa iyang dihog. Kita usab mga propeta. Mao nga kita usab gitawag aron sa pagsangyaw nga maisogon ug madanihon sa pag-abot sa Hari. Kita magsangyaw nga Siya mianhi na alang sa kaluwasan. Kita magsangyaw usab nga mobalik siya aron sa pagluwas. Kinsa man ang atong sangyawan. Natural lamang nga atong hunahunaon nga kadtong mga dili magtotoo ang atong sangyawan, ug apil gyud sila niini. Apan karon, basihan nato ang atong nabasa nga teksto. Si Juan dili misyonaryo nga magwawali sa paagi nga gipadala siya sa ubang mga nasod nga wala pa makadungog sa maayong balita. Si Juan propeta alang sa nasod sa Israel. Siya nagtrabaho una sa tanan diha sa mga katawhan nga natudloan na sa Kasulatan, bisan kun dili esnakto kanunay ang gitudlo kanila. Si Juan wala namuhat diha sa mga Gentil, apan sa mga nawala nga karnero sa Israel.

Mao nga diha ta magkuha ug basihan. Kung sundon nato ang teksto, and atong buluhaton sa pagkapropeta nagsugod dinhi sa niining katawhan sa Dios. Kita magdinasigay sa matag-usa sa pagmata sa kamatuoran nga si Kristo mianhi na sa pagluwas. Kita magdinasigay sa matag-usa sa pagmata sa kamatuoran nga si Kristo moanhi pag-usab aron kumpletohon ang atong kaluwasa. Ato kining buhaton isip isigkamagtutuo, isig ka igsoon, pinaagi sa pagtuon sa Iyang mga pulong ug uban pang mga paagi. Apan ako gayod lakbitan kon sa unsang paagi mabuhat nato kini sa atong mga pamilya. Ang uban nagtuo nga ang espiritohan nga pagtudlo sa mga bata responsibilidad sa iglesia ug sa eskuylahan. Sa ato pa, nga ang atong mga kabataan diha unang makakuha ug espiritohanong nutrisyon gikan a mga pastor ug mga magtutudlo sa eskuylahanm, ug sa uban pa tingali. Apan mga igsoon, pag-abot sa mga kabataan, ang unang paghidungog nila sa pagwali dili gikan sa mga pastor o mga magtutudlo, kondili gikan sa mga ginikanan, labina sa amahan. Sa makadaghan natong mabasa sa Kasulatan nga ang mga ginikanan mao unang

responsible alang sa espirituhanong pagtubo sa ilang mga anak. Ang pinakamaayong lugar nga mahitabo kini mao ang regular nga adlaw-adlawng pinamilya nga pagsimba. Dili nako tuyo nga hisgutan ang mga pamaagi niani. Igo na nga mahibaloan nato nga kung kita nagtinguha nga ang atong mga anak (mga anak sa Dios sa tinud-ay lamang) mag-alagad sa Dios sa mahinungdanon nga paagi, kinahanglang seryosohon nato ang pinamilya nga pagsimba. Ang mga pamilya karon daw bisi na, apan kinahanglan nga mangita kita ug pag-agi nga makahatag pa kita ug igong panahon alang niini. Kinahanglan mangita kita mga pamaagi sa pagtudlo ug pagdisipulo sa atong mga anak aron nga sila usab madhimo niini sa ilang mga ana ug sa uban. Ang isyu mao gayod ang kung unsa ang prayoridad sa atong kinabuhi. Kinsa ug unsa ang labing importante alang kanato? Si Kristo ba nga mianhi ug mobalik pag-usab? O si kinsa ug unsa ba? Unsa man nga mensahe isip mga propeta ang atong ihatag sa matag usa, labaw na sa atong mga anak?

Karon atong tan-awon sa makadiyot ang tawag sa pagpakabana sa ministeryo ni Juan

3. Sa iyang pagpamuhat, nadungog nato ang tawag sa pagpakabana.

Sa gilakbitan ko na, ang pagpamuhat ni Juan usa ka pagpukaw. Sama sa ubang pagpamukaw, kini mahitungod sa oras o panahon. Si Juan nahibalo kung unsa ng orasa kadto. Apan ang katawhan sa Israel wala mahibalo. Si Juan nahibalo ang takna sa pag-abot sa Mesiyas naiabot na. Ang mga tawo wala mahibalo. Kinahanglan nga pahibal-on niya sila nga nabuhi sila taliwala sa nagpanghitabo nga kasaysayan sa pagluwas.

Nabuhi sila sa tugkaran sa pinakadako nga hitabo sa kasaysayan sa kaluwasan. Nabuhi sila sa pagsira sa panahon sa Daang Tugon ug sa pagsugod sa Bag-ong Kasabutan. Sa mubong panahon sa tulo ka tuig, ang sistema sa sakripisyo sa Daang Kasabutan matuman na. Ang tabil sa templo matunga na, simbolo nga ang Dios humana sa mga pamaagi sa templo. Pagkadakong butang nga mabuhi niining panahona!

Tulo ka tuig. Hamubo lamang gayod nga panahon. Daghan niaadtong nakadungog sa wali ni Juan nakakita pa nga ang propesiya sa bersikulo 8 nga natuman. ““Ako nagabautismo kaninyo sa tubig, apan siya magbautismo kaninyo sa Espiritu Santo.” Sulo sa tulo ka tuig, daghan kanila ang naa didto sa Jerusalem sa adlaw sa Pentecostes nga diin ang Balaang Espiritu gibubo a mga tinun-an. Mao kadto ang bautismo nga gihisgutan ni Juan. Kadtong nanagpanuo milantaw pagbalik niining tanan nga natingala. Gisulti ni Juan ug mao gayod ang nahitabo. Sigurado ako nga daghan kanila kung unsa kadako nga pribilihiyo nga mabuhi niadtong mga panahona.

Apan ania kita karon. 2000 ka tuig na ang nilabay. Nabuhi kita pagkahuman na sa pagkayab ni Kristo sa langit. Nabuhi kita humana ang Pentecostes. Ang mahimong mahitabo kanato mao nga mawala kanato ang pagpakabana na nia gihapon kita sa nagapanghitabo pa kasaysayan sa kaluwasan. Ang mahimong mahitabo kanato nga malimot kita sa atong mga pribilihiyo. Ang libro nga nagpangidad na ug usa ka libo ka tuig nagsugilon kanato niining tanan apan mahimo kita nga way pagpakabana.

Nahibalo ba kita kung asa kita niining kasaysayan? Nagtuo ba gayod kita nga ang pagbalik ni Kristo pwedeng mahitabo sa bisan unsang orasa, nga maghatod kanato sa umalabot nga kapanahonan? Ang atong kinabuhi ba nagpakita nga kita gayod nagatuo niini?

Gipamalandungan ba nato uban ang pagpasalamat ang mga pribilihiyo nga nabuhi kita niining panahona? Hunahunaa kuno. Naa na kitay kumpleto nga Bibliya. Ngani kitang tanan pwede na nga makapanag-iya ug Biblia – ngani kitang tanan makabasa na niini – ug kani nga mga kamatuoran makakurat sa mga magtutuo sa unang mga panahon. Dili lamang kana, nabuhi kita uban ang Balaang Espirito a atong mga kasing-kasing, ang gamhanang Dios kauban nato. Imo ba kanang gipamalandungan? O kaha imo lang kana gibalewala? Kung sama ka kanako, murag kadtong ulahi ang akong gakabuhat. Paghatag ug panahon karon ug sultihi ang imong kaugalingon ug pamalandongi, “Ako nabunyagan na sa Balaang Espirito.” Unsa may kahulugan niana kanimo? Dato kita ug dako may nga pribilihiyo. Magpasalamat gayod kita.

Mga igsoon, kinahanglan kita mahibalo kung asa na kita sa kasaysayan ug kinsa kita. Natural, wala kita mahibalo kon kanus-a ang Manluluwas mobalik. Apan ang atong teksto nagdasig kanato sa pagbuka sa atong mga mata. Pabilin kita nga magmata! Nianhi na ang Ginoong Jesus. Mobalik Siya pag-usab – uban ang gahom ug kaluwasan. AMEN.